

MUSA AHMAD SINGKAP KISAH RUNDINGAN BALING

Temuramah Oleh Wahba

(Sedutan Dari Buku: Detik Sejarah Rundingan Baling yang akan diterbitkan oleh Utusan Publications and Distributors).

MUSA Ahmad, bekas Pengerusi Parti Komunis Malaya yang juga komander rejimen ke-10 yang telah menyerah diri pada November 1980 telah membongkar kisah bagaimana mulanya pihak PKM meminta diadakan rundingan Baling 1955, yang mempertemukan antara YTM Tunku Abdul Rahman Putra, David Marshall, Tan Cheng Lock, di pihak kerajaan dengan Chin Peng, Rashid Maidin dan Chen Tien di pihak PKM.

Berikut ialah temuramah saya dengan beliau:

Soalan: Tahukah Encik Musa, mengapa Chin Peng meminta untuk mengadakan rundingan dengan Tunku di Baling pada tahun 1955 itu?



Musa Ahmad

Negara Malaysia

Musa: Setahu saya, pada sekitar tahun 1950an itu, pergerakan komunis menjadi semakin lemah. Orang ramai enggan memberikan sokongan. Chin Peng memang sudah merasa kesusahan dan kesulitan itu. Pada hujung tahun 1952, Chin Peng telah menghantar seorang wakilnya bernama Siow Chong ke Peking untuk mengadakan rundingan dengan pihak komunis China di samping meminta idea bagaimana cara mengatasi masalah pergerakan komunis yang semakin lemah dan tersepit itu. Pihak komunis China dikatakan memberi pendapat buat apa saja yang difikirkan mendatangkan faedah. Dari idea Peking itulah timbul idea untuk meminta pihak kerajaan mengadakan rundingan. Chin Peng kemudian menulis surat kepada Tunku meminta diadakan rundingan, tetapi surat pertama, tidak berjawab. Kalau tidak silap, Chin Peng menulis lagi bagi kali kedua, dan barulah menerima jawapan. Pada bulan Ogos, 1955 pihak China menghantar seorang yang bernama Siow Meng ke Malaya untuk memasang set wireless. Siow Meng seorang operator wireless yang mempunyai kemahiran. Pada masa itulah bermulanya, alat komunikasi terbaru bagi PKM, untuk menghubungi antara unit-unitnya.

"Selepas menerima jawapan dari Tunku, bahawa beliau bersetuju untuk mengadakan rundingan, maka pihak komunis telah mengadakan mesyuarat. Dalam mesyuarat itu, Chin Peng agak resah dan ber-

tanya: Apakah saya mesti pergi atau tidak? Kalau saya pergi, adakah saya ditangkap atau tidak? Demikian soalan-soalan yang ditanya oleh Chin Peng. Tetapi mesyuarat yang dijalankan hari itu mengambil keputusan bahawa Chin Peng mesti menghadiri rundingan itu.

"Kalau Chin Peng, Rashid dan Chen Tien ditangkap ada penggantinya. Dalam rundingan itu, tokoh terpenting ialah Chin Peng sahaja. Tapi kalau Chin Peng ditangkap pun ada penggantinya. Waktu itu, orang yang disebut-sebut akan menggantikan Chin Peng sekiranya berlaku keadaan yang tidak diduga ialah Lee An Tong, iaitu Timbalan Setiausaha Agung PKM.

"Pada waktu itu, saya memang sudah direncanakan untuk dihantar ke luar negeri. Saya dicadang untuk mewakili kongres Parti Komunis China ke-8 di Peking.

"Semasa rundingan Baling itu berlangsung, anggota-anggota PKM sudah dipecah-pecahkan atau diselerakkan ke merata tempat. Lee An Tong umpamanya lari ke hutan Perak, begitu juga dengan orang-orang lain.

"Chin Peng berharap melalui rundingan Baling itu dia akan beroleh kejayaan dan dapat memperdayakan Tunku, tetapi hasrat dan niatnya itu gagal. Pihak kerajaan bertegas dan tidak bertolak ansur. Rundingan itu memberi pukulan hebat kepada PKM terutama Chin Peng.

Soalan: Boleh Encik Musa

terangkan sedikit mengenai rejimen yang ke-10?

Musa: Rejimen yang ke-10 ini ditubuhkan khusus untuk menarik orang-orang Melayu yang beragama Islam menyertainya. Pada mulanya, kami mempunyai pasukan yang umum saja. Di Pahang sudah ada pasukan yang ke-6. Pihak Jawatankuasa Pusat PKM merasakan betapa pentingnya diwujudkan sebuah rejimen yang dianggotai oleh orang-orang Melayu saja. Mereka memikirkan itulah cara yang lebih efektif untuk menarik orang-orang Melayu menyertainya. Waktu itu sudah ada rejimen yang ke-9. Untuk tujuan penubuhan itu, Chin Peng telah memanggil kader-kader Melayu berkumpul di Kerdu Pahang. Semasa penubuhan itu, saya, Abdullah C.D. dan Wahi Anuar ada bersama.

"Semasa penubuhan itu kami memilih nama pasukan sebagai rejimen ke-10, kerana perkataan 'sepuluh' itu ada maknanya yang simbolik. Dalam Islam, 10 Zulhijjah ialah Hari Raya Korban atau pun Hari Raya Haji. Jadi kami memilih angka sepuluh itu sebagai simbol kepada sikap 'pengorbanan'. Tujuannya untuk menaikkan semangat orang Melayu dan Islam, untuk menyertai pasukan tersebut.

"Sebanyak tiga jawatan penting dibentuk pada hari penubuhan itu, iaitu 1) Komander, 2) Penolong Komander dan 3) Pegawai Politik.

"Dalam penyusunan jawatan itu, Abdullah C.D. telah dilantik menjadi Komander merangkap Pesuruhjaya Politik mewakili Jawatankuasa Pusat ke rejimen ke-10. Wahi Anuar



Allahyarham Zainab Mahmad

dilantik menjadi Penolong Komander, dan saya waktu itu dilantik menjadi Pegawai Politik.

"Pada mulanya rejimen ke-10 mempunyai seramai lebih kurang 400 orang rekrut tetapi senjata yang ada cuma untuk satu platoon seramai 30 orang sahaja.

"Waktu itu kami menuntut kepada Chin Peng untuk menggunakan uniform hijau dan bersongkok bagi anggota-anggota rejimen ke-10, tetapi Chin Peng menolaknya. Kami memilih warna hijau dan songkok sebagai lambang kemelayuan dan Islam. Kami merasa hampa dengan penolakan Chin Peng itu.

"Pada peringkat awalnya anggota PKM memakai topi mengandungi tiga bintang. Setiap biji bintang itu

mengandungi lima bucu. Tiga biji bintang itu dipilih untuk mewakili kaum China, Melayu dan India.

"Masa Jepun dulu, terutama selepas Jepun menyerah, nama Bintang Tiga dikenali dan ditakuti. Penggunaan bintang tiga itu kemudiannya diubah menjadi satu bintang saja. Perubahan itu dibuat kerana Parti Komunis China membantah penggunaan tiga bintang. Mereka berkata, penggunaan tiga bintang menggambarkan tidak ada perpaduan. Pihak China mengarahkan dipakai satu bintang saja, bagi melambangkan perpaduan, mewakili rakyat Melayu.

"Rejimen ke-10 diberi sedikit kebebasan, tetapi tidak boleh lari dari kawalan Jawatankuasa Pusat.

"Pada masa itu ada beberapa orang tokoh Melayu terkenal seperti Kamaruzzaman Teh, Rashid Madin dan lain-lain tetapi Kamaruzzaman dan Rashid telah ditangkap oleh pihak berkuasa kira-kira pada pertengahan 1948.

"Saya dan lain-lain anggota, sebelum darurat diisytihar telah menjalani latihan di Lubuk Kawah Temerluh. Ada kira-kira 30 orang menjalani latihan bersenjata ketika itu. Dalam masa latihan kami diberikan 7 raifel, 2 pistol .32 dan .45, dua carbide, 2 Thomson sub-mesin gun, dan beberapa biji bom tangan.

"Senjata-senjata ini sudah agak lama dan tidak mencukupi. Orang-orang Melayu dalam pasukan kami merungut, sedangkan orang-orang Cina mendapat senjata yang lebih

baik dan banyak, tetapi rungutan kami tidak diendahkan langsung."

Soalan: Bukankah itu menunjukkan ada diskriminasi di kalangan anggota PKM sendiri.

Musa: Memang benar. Terdapat perbezaan antara orang-orang Melayu yang jadi komunis dan orang-orang Cina yang jadi komunis. Orang-orang Cina yang jadi komunis mendapat lebih banyak keistimewaan.

"Orang-orang Melayu dilarang pergi ke kawasan orang-orang Cina tetapi orang-orang Cina bebas ke kawasan orang-orang Melayu.

"Dari segi bekalan pakaian dan makanan pun, orang-orang Melayu didiskriminasikan. Umpamanya kalau kita minta 20 pasang kasut, mereka hanya akan memberi 10 pasang sahaja. Kalau orang-orang Cina, 20 yang diminta 20 akan diberi. Begitu juga dalam bekalan makanan. Dari segi mendapat rawatan perubatan pun, orang-orang Melayu dalam PKM tidak mendapat layanan yang sama.

Soalan: Kalau begitu kedudukan nya, maka orang-orang Melayu dalam PKM dianaktirikan?

Musa: Ya. Saya tidak menafikan.

Soalan: Kalau sudah begitu hakikatnya, mengapa orang-orang Melayu yang masih ada dalam hutan itu tidak melarikan diri dan menyerah kepada pihak kerajaan?

Musa: Perkara ni susah saya hendak berikan sebabnya, kerana banyak perkara yang perlu ditinjau. Tetapi saya rasa, untuk ke luar dari hutan itu mereka me-



Pengganas-pengganas komunis yang berjaya ditawan oleh Pasukan Keselamatan semasa darurat.

merlukan keberanian yang luar biasa. Mungkin mereka dikawal ketat oleh pihak PKM. Kalau ada yang terniat untuk ke luar pun, mereka tidak dapat berbuat demikian. Macam saya dulu, saya sudah bertekad, hendak balik ke tanahair. Apa pun terjadi saya mesti balik ke tanahair, hatta yang pulang itu hanya mayat saya.

Soalan: Siapakah di antara rakan-rakan Encik Musa dahulu yang masih berada dalam hutan?

Musa: Saya tidak dapat mengagak dengan tepat, tetapi setahu saya, Rashid Madin, Abu Samah Kassim, Abdullah C.D., Ibrahim Chik dan beberapa orang lagi masih berada dalam hutan. Keadaan mereka agak berlainan dari saya. Mereka hanya terkurung di dalam hutan, sedang-

kan saya sudah ekspos ke dunia luar. Hidup mereka terkawal, dan hanya dibenarkan mendengar siaran-siaran radio komunis saja. Siaran RTM memang tidak dibenarkan dengar langsung.

Soalan: Berbalik kepada penubuhan rejimen ke-10, apakah penubuhan tersebut berjaya mempengaruhi orang-orang Melayu?

Musa: Penubuhan tersebut tidak mencapai matlamatnya. Kami menghadapi kegagalan, kerana orang-orang kampung langsung tidak mahu membantu kami sama ada dari segi membekalkan makanan mahupun alat-alat lain.

"Apabila rejimen kami diserang pada kali pertamanya oleh Pasukan Keselamatan akhir tahun 1949, lebih dari 75 peratus anggota-

anggota kami telah lari dan menyera-
rah diri beramai-ramai kepada pihak
berkuasa di Mentakab, Pahang.

"Ekoran dari serangan tersebut,
komander rejimen ke-10, Abdullah
C.D. dengan diringi oleh kira-kira
30 orang pengganas komunis telah
lari ke Utara dan saya telah diarah
mengetuai seramai lebih kurang 50
orang pengganas yang bergerak di
kawasan Temerluh.

"Di sepanjang tahun 1950,
hubungan unit saya dengan unit-
unit pengganas komunis yang lain
terputus sama sekali.

"Kami hampir mati kebuluran
dan cuma hidup dengan memakan
ubi kayu dan bahan-bahan makanan
yang terdapat di dalam hutan.

"Dalam tahun 1951, unit di
bawah kelolaan saya telah dapat
bergabung semula dengan unit
markas rejimen ke-10 di Mentakab.
Dalam tahun 1952, rejimen ke-10
telah menerima arahan berundur ke
sempadan Malaysia-Thailand
dengan serta merta.

"Saya dan rombongan tiba di
kawasan sempadan pada tahun

1954, dan sewaktu kami tiba, kami
dapati Chin Peng dan ahli-ahli ter-
tinggi PKM bersama-sama dengan
berbagai unit pengganas komunis
yang lain telahpun berundur ke
sana kira-kira setahun lebih awal
dari kami. Yakni mereka berundur
lebih awal dari kami.

"Tidak berapa lama selepas
berada di Selatan Siam itu, Abdul-
lah C.D. telah dilucutkan sebagai
Komander rejimen ke-10 kerana
mempunyai hubungan sulit dengan
Eng Meng Cheng, yang pada waktu
itu masih menjadi isteri seorang
pengganas komunis dan seorang
kader kanan PKM.

"Saya kemudian dilantik men-
jadi Komander dan komisaris poli-
tik rejimen ke-10. Selepas runding-
an Baling 1955, saya dilantik men-
jadi Pengerusi PKM."

(Untuk mengetahui kisah se-
lanjutnya sila membuat tempahan
dengan Pengurus UP&D, Utusan
Melayu Malaysia Berhad, 46M,
Jalan Lima Off Jalan Chan Sow
Lin, Kuala Lumpur 07-04).

MATAHARI

*beraraklah kau mendung
beraraklah kau jauh-jauh
dan kau matahari
bersinarlah, bersinarlah kau
di langit hidupku
yang kelabu.*

Aladin Mohamad.

Bahan asal dari Arkib
Negara Malaysia